

22. oktober 2018

UKA2018/79,50

Imm. 79

Kingusinnerpaamik UKA 2019-mi aningaasarsiaqartitaanermut inatsisip allangortinnissaanut siunnersuusioqqullugit Naalakkersuisut peqquneqarnissaanik Inatsisartut aalajangiiffisassaattut siunnersuut, tassani aalajangersarneqassalluni, Inatsisartunut ilaasortat Folketingimi ilaasortaasut imaluunniit aamma kommunalbestyrelsimi ilaasortaasut aningaasarsiaat appartinneqartassasut tassani atorfirmik aappaani aningaasarsiaasa amerlaqataannik aamma taamannak ilanngaassisoqartassasoq borgmesteritut, borgmesterilluunniit tullersortaattut atorfik eqqarsaatigalugu.

Inatsit atortussanngortinneqassaaq tulliani Inatsisartunut qinersisoqarneraniit.

(Inatsisartunut ilaasortaq Tillie Martinussen, Suleqatigiissitsisut)

Imm. 50

Aningaasarsiaqartitaaneq pillugu inatsisip ilaasortaajunnaarnerisutisiaqartarnermut malittarisassartaasa allangortinnissaannut siunnersuuteqaqqullugit Naalakkersuisut peqquneqarnissaanik Inatsisartut aalajangiiffisassaattut siunnersuut, taamaasilluni ilaasortaajunnaarnerisutisiaqarnerup nalaani akissarsiat tamarluinnaasa ilaasortaajunnaarnerisutisianit ilanngaatigineqarsinnaanngorlugit.

(Inatsisartunut ilaasortaq Niels Thomsen, Demokraatit)

Inatsisartunut ilaasortap Tillie Martinussen Suleqatigiissitsisut Inatsisinik atortussanngortitsinissamik siunnersuutaanut naatsumik imaattumik oqaaseqassuugut.

Tunngaviumik inatsisitta nalunaareerpaa inuk kinaluunniit pisinnaatitaaffeqartoq politikikkut sulinermi sorlermulluunniit qinigassanngortissinnaanermi.

Ullumikkut Politikikkut akuuffigisinnaasagut tassaapput Nunaqarfinni aqutsisut, Kommunalbestyrelsi, Inatsisartuuneq kiisalu Folketingi.

Nunaqarfimmioq Nunaqarfimmi aqutsisunut Kommunalbestyreslimilu ilaasortaasinnaavoq. Aamma Kommunalbestyrelsimut ilaasortaq Inatsisartuni ilaasortaasinnaavoq, Inatsisartunilu ilaasortaq Folketingimut ilaasortaasinnaalluni.

Taamaattoqarporlumi, Siumumiillu paasinninnerput malillugu marloqimmik ilaasortaaffeqarneq inuup nammeneq sulisinnaassusaaniippoq, soorlumi aamma Inatsisartuni kommuunimiluunniit ilaasortaaffeqaraluarluta suliffeqarsinnaasartugut kimulluunniit ajoqutaanngitsumik.

Qinersisarnerli eqqarsaatigalugu isumaqarpugut kinaluunniit sorlermut sassarpat aalajangiisinnaasut pingaarnepaat tassaasut qinersisartut.

Taamatut naatsumik oqaaseqarluta inatsisinik atortussanngortitsilluni suliaqqusineq Siumumiik itingartipparput.

Inatsisartunut ilaasortap Niels Thomsen, Demokraatit Naalakkersuisut peqquneqarnissaanik Inatsisartut aalajangiiffisassaannik siunnersuutaanut imaattumik oqaaseqassuugut.

Siunnersuuteqartup tunngavilersuutigisaani takuneqarsinnaavoq Politikkerinngussagaanni aningaasqarnikkut kingunissai qanoq ituunersut. Inatsisartunngussagaanni atorfik qimattariaqarpoq, namminersortuugaannilu angisuujunngitsunnguamik ingerlataqarluni unitsittariaqarsinnaalluni.

Politikkeriuneq amerlanerpaatigut Partiit arlaanni inissisimaffigalugu peqataaffiusarpoq. Taamaalisimaneq inuiaqatigiit suliffeqarfiillu ilisimallualertarpaat allaat ajorluartumik Partiimi sorlermi ilaasortaasimaneq pissutaalluni, minnerunngitsumik politikikkut ersarissumik

isummersortarsimagaanni, qinikkatut suliunnaareernermi ”atungarliuutinngorsinnaasarluni”. Allaallumi nutaamik suliffittaarniarneq ajornartorujussuannngortarluni. Aammalu namminersortutut namminersortuaqqalluunniit ingerlatsisimalluni nutaamik naqqaniik aallartitsiniarneq oqittuinnaasarani.

Qularnanngilaq siuliani taasakka pissutaallutik, annerpaamik qaammatini 12-ni ilaasortaajunnaar-nersiuteqarsinnaatitaalertarsimallutik. Ilaatigullu aqqissuusinerit taamak ittut piunerini Politikkerinngorniarsinnaaneq pilerinarnerulaalersimassalluni.

Siumumiit oqaatigerusupparput ilaasortaajunnaar-nersiuteqartarneq naapertuilluartumik aqqis-
suunneqassasoq kissaatigigatsigu. Inatsisartunimi ilaasortaasarneq aningaasaannarmiingilaq, aammali nunatta isorartunerujussuanik pissuteqartumik sivisoorsuarmik angalanerit pisarput aamalu angerlarsimaffik /ilaquttat qimassimaneqartarput ilaatigut mikisunik meerartaqaraluaanniluunniit Inatsisartut ataatsimiinneranni najortigilaarnissaannut siunertaralugu nammineerluni aningaasarpas-
sui atorlugit tikisinneqartarlutik.

Nunatsinni Politikkeriuneq orniginartuusariaqarpoq, tamanna maani assortuussutigisinnaa-
gunanngilarput assortuussutiginnngisaannarlutigulumi. Siunnersuuteqartullu ataatsimut isiginnilluni naapertuilluartumik aqqissuussisariaqarnertut isiginnilluni siunnersuutaa Siumumiit assortunngin-
natsigu oqaatigissuarput.

Taamatut oqaaseqarluta suliunnaar-nersiuteqartarneq pillugu nalilersueqqissaarnissaq siulittaasoqar-
fimmi nalilersueqqinnaarnissaq piumasaraarput.

Jess Svane
SIUMUT